

Piek

Omm Moondaach hott misch de Schorsch oogerufe unn hott gefroochd: Honnes, was habbderrn gessdern gemachd?

Mir warn im Wald, habb isch ze Antwort gewwe.

De Schorsch druff: Unn, was habbderrn gemachd im Wald?

Isch saach: Die Beem oogeuggd.

Rischdisch, seet de Schorsch, unn genau dess wollt isch vunn derr wisse, Honnes, weil dess sellwe hawwe mir aach gemachd, awwer schunn omm Somsdaach. Waaßde, unn isch denk, dir giehts genau, die gons Sach mett dere Corona mächt alles su grau, su dusder, doo will merr mol ebbes Farwisches seh. Unn grad gessdern unn vorgessdern war, moon isch, dess Hoch vumm Laub unn soine Farwe, unn weils jertz jeden Daach reeschene dut unn kälde werrd, iss die Herrlichkeit schnell erum unn die Blätter falle erunner.

Schorsch, saach isch, wennde die Farwe nochemol sehe willst fährt gleich moie in de Süde vunn Deitschlond. Weil die Verfärbung unn de Laubfall dun vumm Norde nooch Süde laafe unn vunn de Mittelgebirge wie de Harz unn de Taunus ins flache Lond, im Norde unn uff dene Höhe iss dess alles frieher als wie bei uns, in Freibursch isses noch e paar Daach später.

Honnes, seet de Schorsch, doo konnsde Recht hawwe. Isch habb su e Sendung vunn Amerika unn Kanada geseh iwwe die Laubverfärbung su um die Zeit erum wie jertz, die Indian Summer heeßt unn die aach vumm Norde nooch Süde laafe dut. Wo die grad omm Schennsde iss, doo saache die de Piek driwwer, unn wo de Piek grad iss werrd jeden Daach im Radio unn vumm Fernseh gemeld. Weil doo gibts Leit, die fahrn dem Piek hinnerher, weil aach in dere Eck vunn de Welt die Verfärbung vumm Norde nooch Süde lääft. Weils dort vill Ahornbeem gewwe dut, die sisch in e leuchdend Rot verfärwe, iss dess e greeßer Farbspekakel als wie bei uns.

Isch habb ins Telefon gegrinst. In Amerika iss halt alles greeßer. Awwer uff unser Beem in Gelb unn in Rot loss isch nix kumme, weil aach monschmol innerhalb vunn oom oon-sische Boom dess ze gleicher Zeit ze sehe iss, wie merr dess aach in dem oone oder onnere Boom in unserne Stadt sehe kann. Liewer Schorsch, wenn die Blätter awwer all erunner sinn, wenn Neijohr vorbei iss unn wonns kalt werrd, wadde merr uff de nächsde Piek.

Wie moonsden dess, Honnes, uff was ferrn Piek?, frächt de Schorsch.

Isch habb noch mieh gegrinst: Uff de Piek, also de Piek medde Spritz geesche de Corona-Virus.

Eiern Honnes